

teputeihana ki te Pirimia kia whakapuaretia e te Kawanatanga tetahi huarahi e whai mahi ai nga Ropu mahi.

E ki ana nga Ropu mahi o Niu Tireni nei, na te tukunga mai a te Kawanatanga ka hinga ake nei, i nga puhake o **Ingarangi** i pau ai nga mahi, ka kore he mahi ma te toenga o nga tangata o konei. E ki ana ratou koirā tetahi o nga hara o tera Kawanatanga.

Kei te kaha a te Waari ki te rongoa i te mate nei. Kei te tau te hara o te Kawanatanga ka hinga ra ki a ia me tona Kawanatanga. Kua whawhaitia kia whakaotitia nga rerewe tahu. Kua timataia te mahi o te rerewe ki Waikokopu. Kei te aia mai he tangata ki kona; ki etahi wahi atu hoki.

Kua hokona mai etahi whenua e pa tata ana ki Timaru hei whaka nohonoho ki te tangata.

Na, ki te pakeha, he mate, te **KORE MAHI**. Kia taua ki te Maori he mea kai-ngakaunuitia te kore mahi. E te Iwi, ko te ahūwhenua te ora. Kei a tatou etahi whenua papai tonu kei te minangia mai e o tatou hoa e te pakeha. Ko aua whenua kaore e mahia e tatou kia puta mai he hua i roto. He maha nga taumaha o te whenua kaore e taea te karo; nga reiti, me nga taake. Te take i kore ai e kitea he moni hei utu i nga reiti he kore e whakamahi i te whenua hei utu i ona raruraru.

He maha rawa nga Maori kaore e mahi i te takurua. He maha rawa nga mea e purei piriote ana i nga ra o te wiki, e haurangi ana i nga ra o te wiki. Ko nga pakeha hei nga hatarei rawa ka kitea ki roto i nga whare piriote, ki te hotera ranei.

E te Iwi kei te kaha te pa o te mate nei o te kore mahi ki te pakeha Korikori tatau, whakaaroaro, whakatupato. Tetahi rongoa o tena mate o te kore mahi he—whenua. Kia tupato, kia mataara. Kei pau nga whenua kei te Kawanatanga ka totoro mai te ringa ki o tatau. Na te whenua te Maori i rangatira ai. Mahia taua whenua kia puta mai he hua, kia kii ai he whenua rangatira.

E te Iwi kei te ki te waha o te pakeha ki te aue i te kore mahi. He iwi toa te pakeha. Akuanei ka kawea e te he o te manawa, ka auta noa, ka auta noa. Kaore hoki a te mate ana tirohanga. Kei te pakeha te ringa kaha, ara te mana i muri i te Kawanatanga.

Kaua e moe! E oho! Mahi tahi tatau ko a tatau mema o te Paremete. Kaua e tukua atu ko ratau anake e mataara; ko tatau tahi. Kaore he kaha o te "Ngira Tutahanga" ka waikura, ka whati. Me tui nga ngira katoa, ka oti te kakahu.

Ehara ma wai tatau e tiaki; ma tatau tonu. Ehara ma te Atua. Kaore te Atua e tiaki i te mangere. Kaore te pakeha i te rika mai ki te tango i te rangi i to te Atua kainga.